

VENDIM
Nr. 790, datë 18.12.2024

**PËR DEKLARIMIN “PASURI KULTURORE” TË ZONËS ARKEOLOGJIKE
NËNUJORE “A” TË VENDBANIMIT PALAFIT TË FSHATIT LIN NË
POGRADEC, MIRATIMIN E ZONIFIKIMIT DHE TË PLANIT PËR RUAJTJEN,
MBROJTJEN DHE ADMINISTRIMIN E KËSAJ ZONE**

Në mbështetje të nenit 100 të Kushtetutës dhe të shkronjave “a” dhe “ç”, të pikës 3, të nenit 9, të nënndarjes “iv”, të shkronjës “b”, të pikës 3, të nenit 53, e të nenit 153, të ligjit nr. 27/2018, “Për trashëgiminë kulturore dhe muzetë”, të ndryshuar, me propozimin e ministrit të Ekonomisë, Kulturës dhe Inovacionit, Këshilli i Ministrave

VENDOSI:

1. Deklarimin “Pasuri kulturore” të zonës arkeologjike nënujore të vendbanimit palafit të fshatit Lin në Pogradec.
 2. Miratimin e zonifikimit të zonës arkeologjike nënujore “A” të vendbanimit palafit të fshatit Lin në Pogradec, sipas hartës dhe koordinatave në Kornizën Referuese Gjeodezike Shqiptare (KRGJSH), që i bashkëlidhen këtij vendimi.
 3. Miratimin e planit për ruajtjen, mbrojtjen dhe administrimin e kësaj zone, sipas tekstit që i bashkëlidhet këtij vendimi.
 4. Ngarkohet Agjencia Shtetërore e Kadastrës për regjistrimin e këtij vendimi, në përputhje me ligjin nr. 111/2018, “Për kadastrën”, dhe me aktet nënligjore në fuqi.
 5. Ngarkohet Autoriteti Shtetëror për Informacionin Gjeohapësinor të publikojë hartën e zonës arkeologjike nënujore “A” të vendbanimit palafit të fshatit Lin në Pogradec në Gjeoportalin Kombëtar.
 6. Ngarkohen Ministria e Ekonomisë, Kulturës dhe Inovacionit, Ministria e Turizmit dhe Mjedisit, Ministria e Infrastrukturës dhe Energjisë, Ministria e Bujqësisë dhe Zhvillimit Rural, Ministria e Mbrojtjes dhe Bashkia Pogradec për zbatimin e këtij vendimi.
- Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR
Belinda Balluku

**PLANI PËR RUAJTJEN, MBROJTJEN DHE ADMINISTRIMIN E ZONËS
ARKEOLOGJIKE NËNUJORE “A” TË VENDBANIMIT PALAFIT TË FSHATIT
LIN NË POGRADEC**

Neni 1
Qëllimi

Ky plan përcakton rregullat, procedurat, autoritetet shtetërore, përgjegjëse për ruajtjen, mbrojtjen dhe administrimin e zonave arkeologjike nënujore “A” të vendbanimit palafit të fshatit Lin në Pogradec, si dhe përcaktimin e kufijve të tyre, mbështetur në legjislacionin në fuqi për trashëgiminë kulturore.

Neni 2
Hapësira arkeologjike nënujore në mbrojtje

1. Hapësira nënujore me vlera arkeologjike, historike dhe kulturore e vendbanimit palafit të fshatit Lin në Pogradec, pjesë e trashëgimisë kulturore, dhe e pasurisë botërore ndërkufitare

“Trashëgimia natyrore dhe kulturore e rajonit të Ohrit”, shpallur me vendim të Komitetit të Trashëgimisë Botërore 43 COM 8B.9, viti 2019”, përbëhet nga:

- zona arkeologjike nënujore “A”.

2. Kufijtë e zonës arkeologjike nënujore “A” paraqiten në hartën e zonifikimit të vendbanimit palafit të fshatit Lin në Pogradec, shoqëruar me koordinatat në sistemin referues gjeodezik zyrtar-KRGJSH, pjesë përbërëse e këtij plani.

3. Hartimi dhe miratimi i instrumenteve të planifikimit në lidhje me hapësirën arkeologjike në mbrojtje të vendbanimit palafit të fshatit Lin në Pogradec kryhen në përputhje me rregullat e përcaktuara në këtë vendim.

4. Në zonën e mbrojtur natyrore zbatohen parashikimet e legjislacionit në fuqi për zonat e mbrojtura.

Neni 3

Ndërhyrjet e lejuara në zonën arkeologjike nënujore “A”

1. Në zonën arkeologjike nënujore “A” të vendbanimit palafit të fshatit Lin në Pogradec lejohet vetëm:

a) mirëmbajtja, hulumtimi dhe muzealizimi i strukturave arkeologjike/anijeve të mbytura, rrënojat dhe çdo objekt që gjendet në shtresat nënujore dhe paraqet interes etnografik, arkeologjik, historik, si dhe çdo potencial arkeologjik nënujë, pas shqyrtimit dhe miratimit të projekteve nga Këshilli Kombëtar i Trashëgimisë Kulturore Materiale (në vijim “KKTKM”);

b) kryerja e formave të testimit, të tilla si vrojtim arkeologjik nënujor, sondazhe arkeologjike nënujore, që nuk cenojnë/dëmtojnë pasurinë arkeologjike nënujore, regjistrim digjital i gjetjeve nga institucione të specializuara ose subjekte të licencuara, të përcaktuara me vendim të KKTKM-së;

c) zbatimi i projekteve kërkimore shkencore, të miratuara nga struktura përgjegjëse për miratimin e projekteve kërkimore-shkencore pranë Akademisë së Shkencave, pas shqyrtimit dhe miratimit nga KKTKM-ja.

2. Projektet lidhur me ndërhyrjet e lejuara në zonën arkeologjike nënujore “A”, të vendbanimit palafit të fshatit Lin në Pogradec, të parashikuara në pikën “c”, të këtij neni, shqyrtohen dhe miratohen nga KKTKM-ja dhe më pas vijnë në procedurën, sipas ligjit të planifikimit dhe zhvillimit të territorit.

3. Çdo projekt ose aktivitet i zhvilluar në hapësirën e mbrojtur nënujore “A”, pas miratimit nga KKTKM-ja, mbikëqyret nga institucione të specializuara në fushën e trashëgimisë kulturore, sipas parashikimeve të ligjit nr. 27/2018, “Për trashëgiminë kulturore dhe muzetë”, të ndryshuar.

4. Aktivitetet me karakter turistik, që zhvillohen dhe organizohen nga subjekte të licencuara nga institucionet përkatëse, sipas legjislacionit në fuqi.

Neni 4

Procedurat që ndiqen për ndërhyrjet e lejuara në zonën arkeologjike nënujore “A”

1. Për ndërhyrjet e lejuara në zonat arkeologjike nënujore “A”, projektet shqyrtohen dhe miratohen në KKTKM, sipas procedurës së përcaktuar në nenin 155, të ligjit nr. 27/2018, “Për trashëgiminë kulturore dhe muzetë”.

2. Për çdo rast, KKTKM-ja shqyrton dhe vendos për kryerjen ose jo të formave të testimit. Testimet kryhen nga institucione shtetërore të specializuara dhe/ose subjekte të licencuara në fushën e arkeologjisë. Shpenzimet për kryerjen e formave të testimit mbulohen nga investitori.

3. Testimet e përcaktuara në shkronjën “b”, të pikës 1, të nenit 3, kryhen sipas përcaktimeve të KKTKM-së, pas lidhjes së aktmarrëveshjeve përkatëse, ku në çdo rast, njëra nga palët nënshkruese është IKTK-ja.

4. Për të gjitha ndërhyrjet në zonat arkeologjike nënujore realizohet monitorim arkeologjik gjatë zbatimit të punimeve nga subjekte të licencuara dhe/ose institucione shtetërore të specializuara, si dhe mbikëqyrje arkeologjike nga institucionet e specializuara shtetërore.

Neni 5

Procedura që ndiqet në rast ndërhyrjesh të paautorizuara në zonën arkeologjike nënujore “A” të vendbanimit palafit të fshatit Lin në Pogradec

1. Në rast konstatimi ndërhyrjesh të paautorizuara, brenda zonës arkeologjike nënujore “A”, Drejtoria Rajonale e Trashëgimisë Kulturore (DRTK) për zonën e Pogradecit ka detyrimin të ndërpresë menjëherë veprimtarinë e subjektit, nëpërmjet aktit të konstatimit.

2. Drejtoria Rajonale e Trashëgimisë Kulturore (DRTK) njofton menjëherë IKTK-në, institucionin kompetent për inspektim në fushën e trashëgimisë kulturore dhe/ose institucionin kompetent për inspektim të mbrojtjes së territorit të njësisë vendore, si dhe strukturën përkatëse në ministrinë përgjegjëse për trashëgiminë kulturore.

3. Në rast se subjekti nuk ndërpret veprimet brenda 24 orëve, Drejtoria Rajonale e Trashëgimisë Kulturore (DRTK), përgjegjëse për zonën e Pogradecit, i drejtohet menjëherë institucionit kompetent për inspektim në fushën e trashëgimisë kulturore dhe/ose institucionit kompetent për inspektim të mbrojtjes së territorit të njësisë vendore, për marrjen e masave përkatëse, në zbatim të ligjit nr. 27/2018, “Për trashëgiminë kulturore dhe muzetë”, të ndryshuar.

Neni 6

Aktivitetet e ndaluara në zonën arkeologjike nënujore “A” të vendbanimit palafit të fshatit Lin në Pogradec

1. Ndalohen të gjitha aktivitetet e tjera nënujore, që nuk janë parashikuar në këtë plan, si:
- a) aktivitetet e peshkimit në të gjitha format e tij;
 - b) aktivitete dhe zhytje nënujore, të paautorizuara apo të pamiratuara më parë nga institucionet përkatëse.

Neni 7

Gjetjet rastësore arkeologjike nënujore/detare

1. Klasifikohen si gjetje rastësore arkeologjike nënujore/detare, objektet e luajtshme dhe të paluajtshme në kontekstet e tyre arkeologjike dhe strukturat arkitektonike.

2. Në rast gjetjesh rastësore arkeologjike, gjatë zbatimit të punimeve në zonat arkeologjike, punimet pezullohen menjëherë, sipas procedurës së përcaktuar në nenin 160, të ligjit nr. 27/2018, “Për trashëgiminë kulturore dhe muzetë”, të ndryshuar.

3. Në varësi të vlerave që përmbajnë gjetjet rastësore arkeologjike, KKTKM-ja shprehet për procedurën dhe hulumtimet arkeologjike, të nevojshme për ruajtjen e mbrojtjen e tyre.

4. Për çdo rast, veprimtaria arkeologjike nënujore realizohet sipas parashikimeve të neneve 151, 152, 153, 154, 155, 156, 158, 159, 160, të ligjit nr. 27/2018, “Për trashëgiminë kulturore dhe muzetë”, të ndryshuar.

Neni 8

Trajtimi i rasteve të paparashikuara

Për të gjitha çështjet që nuk trajtohen dhe për pasojë nuk zgjidhen në këtë plan, sipas kompetencave, ato zgjidhen nga ministria përgjegjëse për trashëgiminë kulturore, nëpërmjet institucioneve të specializuara.



Zona arkeologjike nenujore - Lin, Pogradec

Koordinata ne KRGJSH

	E	N
1	553242.47	4546114.14
2	553326.33	4546076.9
3	553381.07	4546130.8
4	553398.57	4546121.7
5	553422.23	4546104.48
6	553498.11	4546001.3
7	553449.3	4545747.03
8	553236.5	4545779.65
9	553223.62	4545824.31
10	553208.22	4545893.75
11	553202.06	4545956.05
12	553221.66	4546037.67